

鴉片事畧

鴉片事畧卷上

江甯李圭小池

鴉片爲中國漏卮爲百姓鴆毒固盡人知之而其於邦國流
行之本末禁令弛張之互用與夫英人以售鴉片而興戎乞
撫又以惡鴉片而設會勸禁三百年來之事則未必盡人知
之用就見聞所及或采自他書或錄諸郵報薈萃成此附以
外國往來文牘曰鴉片事畧攷亞細亞洲西人分地球爲五洲亞細亞五洲之
一也南境有國曰印度漢書所謂身毒又稱天竺者也廣袤四
千餘里東界緬甸西界阿富汗俾路芝南際大海北迄蔥嶺

東北界廓爾喀哲孟雄

一名西金
稱錫金

布魯克巴諸部落密邇三

藏國區爲五地形入海之處爲南印度温都士坦古稱中印

度其厄納特爲四方適中之地孟加刺

音近邦格拉明史
稱榜葛刺音頗近爲

東印度其會城曰加爾格達西印度跨恆河與阿富汗俾路

芝接壤克什米耳爲北印度卽古之罽賓國西北距英吉利

水程約二萬里東南距粵省不及萬里 國朝見據於英吉

利英設總督

英制印度總督
位最尊權最大

駐焉印度屬英本末譯附

印度幅員居中國三之二在昔其國物產之備文字之盛

製造之精中國而外無與比倫國內部落各爲君長明中

葉有部長名巴白者霸於諸部自立爲帝號其朝曰泰麥萬歷間有英京倫敦商賈數人合資創貿易公司於印度以通商東土曰印度公司英君給以憑照準在東土通商不許他商繼迹初僅於印度濱海數處購地造屋若郵落然不數年貿易日盛嗣因印人時與構難英君又準其在印用兵自衛於是購兵船舉官長練兵丁築砲臺規模漸擴時印度泰麥朝猶盛無可乘之隙而英人亦尙安分也其後國勢漸衰部落相繼作亂英公司自衛之兵因此而增其在印度之荷蘭國人法蘭西國人亦皆以兵自衛諸

部長相爭多求助於西人西人立功恆索地以酬最著者英人也闕地故曰大乾隆間秦麥之君爲英人所攻不敵出走繼將辨嘉霸夏亞利撒諸地永屬於公司公司且與之立約每年取銀八百萬兩秦麥幾不國英竟以一貿易公司稱霸印度時英君雖不自兼其國而慮公司尾大亦遣大臣駐其地以箝制之又調軍士數隊戍焉俸餉仰給於公司又命於倫敦設署爲印度公司總署凡事由署議定然後傳令於印度自是公司之權年大一年其地失睦與之戰有不降服者或索地或與盟使類於屬國咸豐

七年公司所屬兵已二十有六萬人年中度支需銀九千五百萬兩是年土人作亂與英人構難欲盡逐英人英人之居內地者多遭駢戮曩得境土岌岌可危英人併力死戰經年卒使其歸服然公司之權亦由是而日替蓋平是亂英君力也事後英君下令其地不再屬於公司而爲英之藩屬公司原設之員亦皆隸於國君英君遂兼有印度稱印度皇帝焉夫此公司也基於貿易之事卒以二萬里外之大國獻之雖曰人事豈非天哉

其地東南兩境產波畢

音近撥開

卽罌粟花也取其漿搏爲塊曰

鴉片

音近阿冰

今所謂洋藥也泰西人紀載之書罌粟初產埃及

國周威烈王時希臘人以其汁取入藥品食之能安神止痛多眠忘憂隋唐之世阿刺伯人自立爲天方國重希人醫學希人名罌粟汁曰阿扁阿人遂變扁音爲芙蓉波斯人又變音爲片故有阿芙蓉阿片之名明人醫學入門云鴉片一名阿芙蓉始見鴉片二字蓋自印度南洋展轉傳至中國復變阿音爲鴉也成化時中國得其取汁之法嘉靖初其法益精泰西化學家謂鴉片內有一質曰醉質食之令人多眠蓋醉去也漸久慣受醉質則成癮既得癮過時不食全體廢弛食

則復初而精神日耗死則隨之阿刺伯既廣種植土耳其波斯諸國效之歐羅巴洲

亦地球五洲之一

各國亦種此印度種最後

其種有二十五而堪用者甚少產土耳其波斯多白花白子

產印度者兩種一亦白花白子一紅花黑子平原所植俱白

花出喜馬拉山

亞細亞洲境最高之山

俱紅花法國人以其子榨油香

美頗好之英人亦用其漿爲藥材印人則取乾塊爲餅嚼食

款客南洋諸島有生食者俾路芝以西各部酋皆酷嗜之亦

生食也明末蘇門答臘

在南洋新加坡之西

人變生食爲吸食其法先

取漿蒸熟濾去渣滓復煮和菸草葉爲丸置竹管就火吸食

回教嚴酒禁而酷嗜鴉片近二十年美國因旅居華人吸食者眾亦有習食成癮者印人亦多習食毒物蔓延遂及天下而中國受禍爲獨鉅歐洲近今不種阿刺伯土耳其諸國俗尙因循故所產不加多而印度得英人督率榨漿搏塊以機器代人力遂年增一年其來中國者名有四產邁爾窪部而由孟買一作孟米一作孟美出海口者曰白皮乃印度官中自種箱百六七十枚至二百枚重百斤今所謂小土卽小洋藥也產孟加刺部之派託拏者曰公班賓乃斯者曰刺班一曰姑派託拏賓乃斯皆地名按洋文地圖譯音乃英吉利官中所種箱四十枚重百二十斤

則皆由加爾格達城出海口今所謂大土卽大洋藥也其他波斯所產曰新山又曰紅肉土耳其基所產曰金花亦俱爲小土也英人初有印地歲徵其稅後見流入中國吸食漸眾銷路日暢於是印度人之操其業者莫不爭種印酋英官見獲利之鉅也咸命官經理其事不許民間私種英於孟買加爾格達兩海口設關權稅箱納英金六十磅其時磅核銀約二兩五錢前明萬曆十七年定阿片每十斤稅銀二錢是爲中國徵稅之始康熙二十三年海禁弛南洋鴉片列入藥材每斤徵稅銀三分其時沿海居民得南洋吸食法而益精思之煮土成膏鑲

竹爲管就燈吸食其煙不數年流行各省甚至開館賣煙雍正中定興販鴉片煙者照收買違禁貨物例枷號一月發近邊充軍私開鴉片煙館引誘良家子弟者照邪教惑眾律擬絞監候爲從杖一百流三千里船戶地保鄰佑人等俱杖一百徒三年兵役人等藉端需索計贓照枉法律治罪失察之汛口地方文武各官並不行監察之海關監督均交部嚴加議處尙未及吸食者罪名乾隆二十年稅則仍載鴉片一斤估價五錢似徵稅如故也嘉慶十五年三月京師廣甯門盤獲楊姓身藏鴉片六盒請交刑部審辦得旨鴉片煙性最

酷烈食此者能驟長精神恣其所欲久之遂致戕賊身命大
爲風俗人心之害本干例禁該犯楊姓膽敢攜帶進城實屬
藐法著卽交刑部嚴審辦理惟此項鴉片近聞購食者頗多
奸商牟利販賣接踵而來崇文門專管稅務僅於所屬口岸
地方稽察恐尙未能周到仍著步軍統領五城御史於各門
禁嚴密訪查一有緝獲卽當按律懲治並將其煙物毀棄至
閩粵出產之地並著該督撫關差查禁斷其來源毋得視爲
具文任其偷漏二十年三月 諭粵督蔣攸銛等奏酌定查
禁鴉片煙章程請於西洋貨船到澳門時先行查驗並明立

賞罰使地方知所懲勸等語鴉片煙一項流毒甚熾多由夷船夾帶而來嗣後西洋貨船到澳門時自應按船查驗杜絕來源至粵省行銷鴉片煙積弊已久地方官皆有失察處分恐伊等瞻顧因循查拏不力嗣後有拏獲鴉片煙之案除查明地方委員等有得規故縱情事應嚴參辦理外其僅止失察者概行寬免處分至所請獲興販煙斤自二百斤至五千斤以上分別紀錄加級及送部引見並軍民人等拏獲獎賞以及誣良治罪之處俱著照該督等所請行自是入口者率暗中偷運價值益增洋船初尙泊於澳門繼且移之黃埔皆

於貨物交易時夾帶私售道光元年查出葉恆澍夾帶鴉片之案奉旨重申前禁凡洋船至粵先令行商出具所進黃埔貨船並無鴉片甘結方準開艙驗貨其行商容隱事後查出加等治罪開館者議絞販賣者充軍吸食者杖徒自此鴉片躉船盡徙於零丁洋其地水路四達凡閩浙天津之泛海者就地交易銷數之暢如故何則科條加重販者吸者罪皆不及於死而有癮者頃刻無煙卽有性命之憂是以甘心觸犯購求愈切奸販乘其所急得以居奇胥役包庇關津賣放皆由此起逮躉船移零丁洋後而鴉片愈矜貴價值愈擡高

癸二年二月御史黃中模奏請嚴禁海洋偷漏銀兩一摺

諭廣東督撫洋商與外夷勾通販賣鴉片煙重爲風俗之害
皆由海關利其重稅隱忍不發以致流傳甚廣著該督撫密
訪海關監督有無收受黑煙重稅據實奏聞並通飭各省關
隘一體嚴密查拏兩廣總督阮元奉 廷旨密查奏請暫事
羈縻徐圖禁絕三年八月定失察鴉片煙條例鴉片煙一項
流毒甚熾總由地方官查拏不力所致向來地方官止有嚴
參賄縱之例並無議處失察之條且止查禁海口洋船而於
民間私熬鴉片未經議及條例尙未周備嗣後如有洋船夾

帶鴉片煙進口並奸民私種罌粟煎熬煙膏開設煙館文職
地方官及巡查委員如能自行拏獲究辦免其議處其有得
規故縱者仍照舊例革職若止係失於覺察按其鴉片多寡
一百斤以上者該管大員罰俸一年一千斤以上者降一級
畱任五千斤以上者降一級調用武職失察處分亦照文職
畫一辦理其文武官拏獲煙斤議敘均著照舊例行惜其時
蘆船已改泊急水門金星門等處旬結內地奸民往來傳送
於是鴉片之來每年驟增至數萬箱洋商易貨無多輒載銀
出洋回國內地銀荒日甚 朝廷憂之十年六月定查禁內

地行銷鴉片章程十六年太常寺少卿許乃濟上言近日鴉片之禁愈嚴而食者愈多幾徧天下蓋法令者胥役棍徒之所藉以爲利愈峻則胥役之賄賂愈豐棍徒之計謀愈巧臣愚以爲匪徒之畏法不如其驚利且逞其鬼蜮伎倆則法令亦有時而窮究之食鴉片者率皆浮惰無志不足輕重之輩亦有逾耆艾而食之者不盡促人壽命海內生齒日繁斷無耗滅戶口之虞而歲竭中國之脂膏則不可不早爲之計閉關不可徒法不行計惟仍用舊制照藥材納稅但祇準以貨易貨不得用銀購買應將紋銀番洋一體嚴禁偷漏又官員

士子兵丁不得漫無區別犯者應請立加斥革免其罪名該管上司及統轄各官有知而故縱者仍分別查議似此變通辦理庶足以杜漏卮而裕國計奉旨交疆臣會議時九卿臺諫多不爲然給事中許球論弛鴉片之禁既不禁其售賣又豈能禁人吸食若止禁官與兵而官與兵皆從士民中出又何以預爲之地況明知毒人之物而聽其流行復徵其稅課堂堂天朝無此政體臣愚以爲與其紛更法制盡撤藩籬曷若謹守舊章嚴行整頓自古制夷之法詳內而畧外先治己而後治人必先嚴定治罪條例將販賣之奸民說合

之行商包買之審口護送之蟹艇賄縱之兵役嚴密查拏盡法懲治而後內地庶可肅清若坐地夷人先擇其分住各洋行著名奸猾者查拏拘守告以定例勒令具限使寄泊零丁洋金星門之躉船盡行回國並令寄信該國王鴉片流毒內地戕害民生天朝已將內地販賣奸民從重究治所有坐地各夷人念係外洋不忍加誅如鴉片躉船不致再入中國卽行寬釋仍準照常互市倘仍前私販潛來勾誘定將坐地夷人正法一面停止互市似此理直氣壯該夷人不敢存輕視之心庶無所施其伎倆得旨鴉片煙來自外洋流毒內

地例禁綦嚴近日言者不一或請量爲變通或請仍嚴例禁
必須體察情形通盤籌畫行之久遠無弊方爲妥善著鄧廷
楨等將摺內所奏如販賣之奸民說合之行商包買之密口
護送之蟹艇賄縱之兵丁嚴密查拏各情節悉心妥議力塞
弊源據實具奏是時鴉片弛禁之議已不行疆臣奏覆率請
嚴定販賣吸食罪名十八年閏四月鴻臚寺卿黃爵滋奏請
將鴉片從嚴懲辦以塞漏卮其疏畧曰考諸 純帝之世簞
邊之需幾何 巡幸之費幾何修造之用又幾何而上下充
盈號稱極富至嘉慶以來猶徵豐裕士大夫之家以及巨商

大賈奢靡成習較之目前不啻霄壤豈愈奢則愈豐愈儉則愈嗇邪竊見近來銀價遞增每銀一兩易制錢一千六百有零非耗銀於內地實漏銀於外夷也蓋自鴉片流入中國我仁宗睿皇帝知其必有害也故告誡諄諄例有明禁然當時臣工亦不料其流毒至於此極假早知其若此必有嚴刑重法過於將萌查例載凡洋船到廣必先取具洋商保結保其必無夾帶鴉片然後準其入口其時雖有保結視爲具文夾帶斷不能免故道光三年以前每歲漏銀數百萬兩其初不過緇袴子弟習爲浮靡尙知斂戢嗣後上自官府縉紳下

至工商優隸以及婦女僧尼道士隨在吸食置買煙具爲市
日中盛京等處爲我朝根本重地近亦漸染成風外洋來
煙漸多另有躉船載煙不進虎門海口停泊於洋中之老萬
山大嶼山等處粵省奸商勾通巡海兵并用扒龍快蟹等船
運銀出洋運煙入口故自道光三年至十一年歲漏銀一千
七八百萬兩自十一年至十四年歲漏銀二千餘萬兩自十
四年至今漏至三千餘萬兩之多此外福建浙江山東天津
各海口合之亦數千萬兩以中國有用之財填海外無窮之
壑易此害人之物漸成病國之憂日復一日年復一年臣不

知伊於胡底各省州縣地丁漕糧徵錢甚多及辦奏銷悉以錢易銀折耗太苦故前此多有盈餘今則無不賠墊各省鹽商賣鹽俱係錢文交課盡歸銀兩昔之爭爲利藪今則視爲畏途若再數年間銀價愈貴奏銷如何能辦稅課如何能清設有不測之用又如何能支今天下皆知漏在鴉片所以塞之之法亦紛紛講求或謂嚴查海口杜其出入之路固也無如稽查員弁未必悉皆公正每歲計有數千餘萬兩之交易分潤毫釐亦不下數百萬兩利之所在誰肯認真查辦偶有所獲已屬寥寥況沿海萬餘里隨在皆可出入不能塞漏卮

者一也或曰禁止通商拔其貽害之本似也不知洋夷載入呢羽鐘表與所載出茶葉大黃湖絲通計交易不足千萬兩其中沾潤利息不過數百萬兩尙係以貨易貨較之鴉片之利不敵十分之一故夷人之著意不在彼而在此今雖割棄粵海關稅不準通商而煙船本不進口停泊大洋居爲奇貨內地食煙之人刻不可緩自有奸人搬運故難防者不在夷商而在奸民不能塞漏卮者二也或曰查拏興販嚴治煙館雖不能清其源亦庶可遏其流不知自定例以來興販鴉片者發邊遠充軍開設煙館者照左道惑人引誘良家子弟例

罪至絞今天下興販者不知幾何開設煙館者不知幾何而各省辦此案者絕少蓋粵省總辦鴉片之人據該審口自廣東以至各省沿途關口聲勢聯絡各省販煙之人其資本重者審口沿途包送關津書吏容隱放行轉於往來客商稽查煙爲名恣意畱難勒索其各府州縣開設煙館者類皆奸猾吏役兵丁勾結富家大族不肖子弟素有聲勢於重門深巷之中聚眾吸食地方官之幕友家丁等半溺於此未有不庇其同好者不能塞漏卮者三也或又曰聽開罌粟之禁聽內地熬煙庶可抵當外夷之所入漸久不致紋銀出洋殊不知

內地所熬之煙食之不能過癮不過興販之人用以攬和洋煙希圖重利此雖開種罌粟之禁不能塞漏卮者四也然則鴉片之害終不能禁乎實未知其所以禁也夫耗銀之多由於販煙之盛販煙之盛由於食煙之眾無吸食者自無興販無興販則外夷之煙自不來矣今欲加重罪名必先重治吸食臣請 皇上嚴降諭旨自今年某月某日起至明年某月某日止準給一年期限戒煙雖至大之癮未有不漸斷者倘若一年以後仍然吸食是不奉法之亂民置伊重刑無不平允查舊例吸食鴉片者罪僅枷杖其不指出興販者罪止杖

一百徒三年然皆係活罪斷癮之苦甚於枷杖與徒杖等該犯明知不肯斷絕若罪以死論是臨刑之慘急更苦於斷癮之苟延臣知其情願絕癮而死於家不願受刑而死於市惟皇上明慎用刑之意誠恐立法稍嚴互相告訐必至波及無辜然吸食鴉片者是否有癮無癮到官熬審立刻可辨如非吸食之人雖大怨深仇不能誣枉良善果係吸食者究亦無從掩飾故雖用刑並無流弊臣查余文良臺灣志云咬嚼肥本輕捷善鬪紅毛製造鴉片誘使食之遂疲羸受制其國竟爲所據紅毛人有自食鴉片者其法集眾紅毛人環視繫

其人桿上以礮擊之入海故紅毛無敢食者今入中國之鴉片來自英吉利等國其法有自食鴉片者以死論故各國祇有造煙之人無一食煙之人臣又聞夷船到廣時由孟買經安南邊境初誘安南人食之安南覺其陰謀立即嚴禁凡有食鴉片者死不赦夫以外夷之人尙令行禁止況我皇上雷霆之威赫然震怒雖愚頑之沈溺既久自足以發瞶振聵但天下大計非尋常所及願 聖明乾剛獨斷不必眾意皆合誠恐畏事之人未肯爲國任怨明知非嚴刑不治託言吸食人多治之過驟則有決裂之患今寬限一年是緩圖也在

諭旨初降之時總以嚴切爲要 皇上之旨嚴則奉法之
吏肅奉法之吏肅則犯法之人畏一年之內尙未用刑十已
戒其八九已食者竟藉 國法以保餘生未食者亦因戒煙
以全身命此 皇上止辟之大權卽好生之盛德也復請

諭飭各省督撫嚴切曉諭廣傳戒煙藥方予限吸食並一面
嚴飭各府州縣清查保甲預先曉諭居民定於一年後取具
五家鄰佑互結仍有犯者準令舉發給與優獎倘有容隱一
經查出本犯照新例處死外互結之人照例治罪至如通都
大邑五方雜處往來客商去來無定鄰佑難於查察責成鋪

店如有容留食煙之人照窩藏匪類治罪現在文武大小各官如有逾期吸食者以知法之人爲犯法之事應照常人加等除本犯官治罪外其子孫不準考試地方官於定例一年後如能實心任事拏獲多起者照獲盜例議敘以示鼓勵其地方官署內官親幕友及家丁仍有吸食被獲者除本犯治罪外該本管官嚴加議處各省滿漢營兵每伍取結照地方保甲辦理其管轄失察之人照地方官衙門辦理庶幾軍民一體上下肅清無論窮鄉僻壤務必布告詳明使天下曉然於 皇上愛惜民財保全民命之至意如是則漏卮可塞銀

價不至再昂然後講求理財之方誠天下萬世臣民之福也
得 旨黃爵滋奏請嚴塞漏卮以培國本一摺著盛京吉林
黑龍江將軍直省各督撫各抒所見妥議章程迅速具奏時
湖廣總督林則徐奏最剴切疏曰查原奏內稱耗銀之多由
於販煙之盛販煙之盛由於食煙之眾今欲加重罪名必先
重治吸食等語臣伏思鴉片流毒於中國紋銀潛耗於外洋
凡在臣工誰不切齒是以歷年條奏不啻發言盈庭而於吸
食之人未有請用大辟者以 大清律例早有明條近復將
不供與販姓名者由杖加徒已屬從重若逕坐死罪是與十

惡無所區別卽於五刑恐未協中一則以犯者太多有不可勝誅之勢右議刑過重則弄法滋奸恐訐告誣攀賄縱索詐之風因而愈熾所以論死之說私相擬議者未嘗乏人而毅然上陳者獨有此奏然流毒至於已甚斷非常刑之所能防力挽頽風非嚴蔑濟茲蒙 諭旨飭議雖以臣之愚昧敢不竭慮籌維竊謂治獄者固宜準情罪以折其平而體 國者尤宜審時勢而權所重今鴉片貽害於內地非難於革癮而難於革心欲革玩法之心安得不立怵心之法況行法在一年以後而議法在一年以前轉移之機正繫諸此惟是吸煙

之輩陷溺已深志氣無不昏惰今日安知來日當夫嚴刑初設雖亦魄悚魂驚而轉思期限尙寬姑俟臨時再斷至期迫而又不能驟斷則罹法者仍多故臣謂轉移之機卽在此一年之中必直省大小官員其矢一心極力挽回間不容髮期於必收成效永絕澆風而此法乃不爲贅設謹就臣管見所及擬具章程六條爲我 皇上敬陳之一煙具先宜收繳盡淨以絕饒根也查吸煙之竹桿謂之鎗其鎗頭裝煙點火之具又須細泥燒成名曰煙斗凡新鎗新斗皆不適口且難過癮必其素所習用之具有煙油積乎其中者愈久而愈寶之

此外零星器具不一而足然尙可以他具代之惟鎗斗均難
替代而斗比鎗尤不可離今須責成州縣盡力收繳鎗斗視
其距海疆之遠近與夫地方之衝僻戶口之繁約民俗之華
樸由各大吏酌期定數責以起獲示以勸懲除新鎗新斗聽
該州縣自行毀碎不必核計外凡積油之鎗斗皆須包封黏
貼印花彙冊送省該省大吏當堂公同啟封毀碎無論此具
或由搜獲或由首繳或由收覓皆許核作州縣功過之斷數
若地方繁庶而收繳寥寥者立予撤參如能格外多收亦當
分別獎勵一此議定後各省應卽出示勸令自新仍將一年

之期劃分四限遞加罪名以免因循觀望也查重典之設原
爲吸食起見果能人人斷吸亦又何求各省奉文之後應由
大吏發給告示徧行剴切曉諭自奉文之日起扣至三箇月
爲初限如吸煙之人於限內改悔斷絕赴官投首者請照習
教人首明出教之例準予免罪然投首非空言也必將家藏
器具幾副餘煙若干全行呈繳到官出具改悔自新毫無藏
匿器具甘結加具族鄰保結立案報查如日後再犯或被告
發或經訪聞拘訊得實加倍重辦其二三四限之內投首者
雖不能概予免罪似亦可酌量減輕惟不投首者一經發覺

卽須加重蓋四時成歲三月成時氣候不爲不久果知畏法
儘可改悔若仍悠忽遷延再三自誤揆以誅心之律已非徒
杖所可蔽辜除初限以內拏獲者仍照原例辦理外其初限
以外四限以內未首之犯拏獲審實似應按月遞加一等至
軍爲止其中詳細條款並先後投首如何減等首後首犯如
何懲辦之處均請 飭部核議施行似此由寬而嚴由輕而
重不肖之徒如再不知悔懼置之死地誠不足惜矣一開館
興販以及製造煙具各罪名均應一體加重並分別勒限繳
具自首以截其源也查開館本係死罪興販亦應遠戍近因

吸食者多互相包庇以致被獲者轉少今吸煙旣擬重刑若輩豈宜末減應請一體加重方昭平允但澆俗已深亦宜予以自新之路請自奉文之日始開館者勒限一月將煙具煙土全繳到官準將原罪量減如係拏獲照原例辦理地方官於一月內辦出者無論或繳或拏均免從前失察處分倘逾限拏獲犯照新例加重自獲之員減等議處其興販之徒路有遠近或於新例尙未聞知不能概限一月投首應請酌限三箇月內不拘行至何處準赴所在有司衙門繳煙免罪若逾限發覺亦應論死其繳到之煙土煙膏眼同在城文武加

用桐油立時燒化投灰江河匿者與犯同罪至製造煙具之人近日愈多如煙槍固多用竹亦間有削木爲之大抵皆煙袋鋪所製其鎗頭則裹以金銀銅錫鎗口亦飾以金玉角牙又聞閩粵間又有一種甘蔗鎗漆而飾之尤爲若輩所重其煙斗自廣東製者以洋磁爲上在內地製者以宜興爲寶恐其屢燒易裂也則亦包以金銀而發藍點翠各極其工恐其屢吸易塞也則又通以鐵條而矛戟錐刀不一其狀手藝之人喜其易售奇技淫巧競相傳習雖照例懲辦而製造如故應請概限奉文一月內將所製大小煙具全行繳官毀化免

罪並示諭煙袋作坊瓦器窰戶以及金銀銅錫竹木牙漆各匠互相稽查如逾限不首及首後再製俱照新例重辦其裝成鎗斗可用吸食者卽應論死保甲知情不首與犯同罪一失察處分宜先嚴於所近也文武屬員有犯該管上司於奉文三箇月內查明舉發者均予免議逾限失察者分別議處其本署戚友家丁近在耳目之前斷無不知應勒限一箇月查明若不能早令革除又不肯據實舉發卽是有心庇匿除本犯加重治罪外應將庇匿之員卽行革職本署書差有犯限三箇月內查明懲辦逾限失察者分別降調一地保牌頭

甲長本有稽查奸宄之責凡有煙土煙膏煙具均應著令查起也挾仇訐告之風固難保其必無但能起獲贓證卽已有據且起一具便少一害雖初行之時亦恐難免滋擾然凡事不能全無一弊若果吸煙者懼其滋擾而皆決意斷絕不爲無裨至開館之房主及該地方保甲斷無不知之理若不舉發顯係包庇應與正犯同罪並將房屋入官一審斷之法宜預講也此議定後除簡僻州縣犯者本少卽有一二無難隨時審辦外若海疆商賈碼頭及通衢繁會之區吸食者不可勝計告發旣多地方有司日不暇給卽終日承辦而片刻放

鬆則癮已過矣委人代看則弊已作矣是非問罪之難而定
罪之難也要知吸食之虛實原不在審而在熬熬一人與熬
數人數十人其工夫一也且專一人容或有弊多人同熬轉
可無欺譬如省會地方擇一公所彙提被控拘拏之人委正
印以上候補者一員往審足矣臨審時恐其夾帶過癮則必
先將身上按名嚴搜卽糕點亦須敲碎然後點入封門如考
棚之坐號各離尺許不準往來問官亦止準帶一丁二役隨
身伺候不許擅離自辰巳以至子丑祇須靜對不必問供而
有癮之人情態已皆百出矣其審係虛誣者何員所審卽令

何員出具切結倘日後別經發覺惟原審官是問以上六條
理合繕摺具奏再有丸方兩種飲方兩種另單請頒行各省
以資療治謹奏其戒煙方總論曰人之喉管有二食管以主
飲食下達二腸氣管以主呼吸周通五臟氣管本屬清虛不
受一粒半滴之物若物誤入其中卽時咳逆必出之而後快
而煙乃有氣無形之物故可吸入呼出往來於五臟雖其氣
已去而其質仍畱但人之所以得生者胥藉胃間所納穀氣
循環於經絡以培養其精神今食煙之人其臟肺慣得煙氣
以克穀氣故常人一日不食五穀則飢而憊食鴉片煙者視

五穀猶可緩但對時不吸煙則癮發而憊無他正氣爲邪氣所制也本草所載生煙卽今之旱煙其氣辛故止於入肺若鴉片則其性毒而淫其味瀆而滯其色黑而入肝腎故一吸而能透於肉筋骨髓之中一呼又能達於肢體毛皮之杪徧身內外上下無處不到是以食纔下咽自頂至踵均覺舒暢遂溺其中始則由漸而常繼則由常而熟至於熟矣內而臟腑經絡外而耳目手足皆必得此煙氣而後卽安一旦無之腎先告乏故呵欠頻作肝因而困故涕淚交流肺病則痰涎並生心病則痿軟自汗必至是時而起者脾主信故也彼溺

乎其中者至是而適受其困矣然溺而知戒不過困於一時
溺而不戒則直徇以身命以煙氣克穀氣引邪奪正其能久
乎果其戒之並非難事癮之輕者與體之壯者卽無藥方亦
可斷絕茲專爲受癮深而氣體薄者立前後兩方一曰忌酸
丸一曰補正丸忌酸丸卽煙灰和藥爲之緣戒時不能遽絕
故以灰代煙也重用附子者取其走而不守能通行一十二
經也佐以柴胡之左旋升麻之右旋沈香之直達下焦四者
相合則徹乎上下表裏頃刻而能徧於一身矣顧吸煙之人
中氣無不傷者中氣傷則氣不能化精而血衰故用參耆以

補肺氣白朮以補脾氣陳皮木香以利諸氣皆所以安其中也中氣既固再有當歸連柏以涼血而生血且連柏能殺附子之毒以生一源之水且制二相之火也氣血兩虛之人保無昏暈非天麻不能止故加以天麻其用甘草者不但可以補中兼可益血並和諸藥也此方氣血兩補而藥味不雜寒熱並用而於理不悖煉以爲丸吞入於胃行氣於五臟輸精於經絡不俄頃亦卽徹頂踵徧內外無處不到是以煙癮不起諸病不作且有沈木二香氣息芬芳藉附子行之熏蒸於五臟之中吞至數日後若再取過火之煙吸之不獨臟氣與

之扞格卽鼻孔聞之已嫌其臭矣補正丸卽以忌酸丸之方
減去黃耆木香二味不用附子且不用煙灰其餘藥味分兩
均與忌酸丸方同凡戒煙者先吞忌酸丸至三五日後每日
減忌酸丸一丸則以補正兩丸替之減二丸則以四丸替之照
此遞推互相加減至忌酸丸減盡再專服補正九十日或半
月後卽連補正丸亦不用服而癮自斷矣此方歷試歷驗具
有神效緣有補中益氣之藥日減有煙之一丸以去邪癮日
增補正之二丸以助正氣正氣日足邪無所容卽使至重之
癮果能痛自改悔照法行之不過畧多數日未有不能斷絕

者全身命以保餘生懔 國法而免刑戮凡有血氣心知之
人有不覺悟自新迷途早返者哉方藥製法開後忌酸丸方
不曰戒煙丸而曰忌酸丸者蓋以既用煙灰吞服之後若與
味酸之物同食則令人腸斷而死故以忌酸名方欲服之者
顧名知忌耳生洋參五錢白朮三錢當歸二錢黃柏四錢川
連四錢炙黃耆三錢五分炙甘草三錢五分陳皮二錢五分
柴胡二錢五分沈香二錢忌火木香二錢忌火天麻三錢升
麻一錢五分其爲細末入生附子七錢米泔浸透石臼中搗
如泥再入煙灰一兩攪勻入麪糊同藥爲丸如小桐子大丸

成後其稱重若干約計平時有癮一分者每日所服之丸須有煙灰一釐二毫爲度必於飯前吞下否則不驗起初一二日或多吞些令其微有醉意則有煙亦不思食矣補正丸方生洋參白朮當歸黃柏川連炙甘草陳皮柴胡沈香天麻升麻分兩俱照前方其爲細末用蜜和丸如桐子大以之頂換忌酸丸如初一減忌酸丸一丸則用補正丸二丸吞下至初二則減忌酸丸二丸又用補正丸四丸吞下餘可類推如癮重者一劑不能盡除卽多服兩劑癮亦必斷忌酸丸加減法紅白痢加黃芩白芍夢遺加龍骨牡蠣諸痛加重木香元胡

索咳嗽加紫苑炙冬花炙枇杷葉去毛咳甚者加杏仁阿膠
熱痰加川貝母瓜萹霜寒痰加半夏南星若覺下焦有火加
黃柏知母眩暈加丹皮白菊小便短加豬苓澤瀉水瀉加白
茯苓車前身體不虛者去洋參換沙參炙蒼不必用如無頭
暈者不用天麻氣短不足者加蛤蚧尾氣喘者加故紙並加
蛤蚧尾以上或入藥或煎湯送下附錄簡便二方忌酸補正
前後丸方極靈驗矣而配合兩劑需錢數千文彼憚於斷煙
者尙有所藉口或謂一時乏此整款或謂配合費事有需時
日卽勸人斷煙者亦未必均肯捐資多製藥丸隨人施給雖

刀圭可以救病如畏難苟安何故又附錄兩方皆費錢極少而爲效甚捷者庶窮鄉僻壤之地輿臺奴隸之微但使一念知悔皆可立刻自醫更何畏難之有一曰四物飲赤砂糖一斤生甘草一斤川貝母八錢去心研細鴉片灰三錢癮重者四錢石四物以清水十餘大碗入銅鍋煎兩三時約存三四碗愈濃愈妙將渣漉出取汁貯瓷甕內置靜室無人行處每日早起及夜臥之前各取汁一盃以開水溫服癮卽可斷如癮極重者取已煎之汁而重煎之十盃煎成一盃照前再服必效一曰瓜汁飲南瓜正在開花時連其葉與根藤一併取

下用水滌淨於石臼中合而搗之取汁常服不數日夙癮盡去甫經結瓜者連瓜搗之亦可用謹按本草載南瓜甘溫無毒補中益氣截其藤有汁極清如誤吞生鴉片者以此治之卽不死是其解毒如神故除癮亦極著效此物最易蔓生雖荒僻邨野無處無之惟至冬則藤葉皆枯無汁可取其在夏秋則取之不窮並可不費錢而得凡勸人戒煙者皆宜多取此汁廣貯罈甕留以濟人亦不費之惠疏上後復以各省章奏未齊定議需時慮民心一放難收乃商之湘鄂兩巡撫飭屬先訪開館興販之徒嚴緝務獲又會同出示剴切禁戒捐

廉配製斷癮藥丸於省城漢口鎮等處設局派員收繳煙鎗
煙斗及一切器具餘煙隨據拏獲及首繳煙土煙膏一萬二
千餘兩煙鎗一千二百餘桿煙斗雜具俱全湘省亦收繳煙
鎗二千三百餘桿民婦多叩頭稱謝謂其夫男煙癮服藥斷
絕身體漸強平日不能斷者至是皆恃 國法有以斷之時
新例尙未頒行而情形業已如是林總督見其機不可失又
上疏稱鴉片流毒天下爲害甚鉅法當從嚴若猶泄泄視之
數十年後中國無可以禦敵之兵亦無可以充餉之銀 上
深違之七月步軍統領衙門奏拏獲職官吸食鴉片煙降

旨將該員革職並將販賣人等交刑部審訊九月莊親王奕
賚輔國公溥喜等以吸食鴉片煙革爵奉 諭鴉片煙流毒
內地官民煽惑傳染日深前年太常寺少卿許乃濟奏請弛
禁朕卽以爲不得政體本年鴻臚寺卿黃爵滋奏請嚴禁當
降旨飭令直省將軍督撫各議章程昨復令大學士等會議
朕於此事深加痛恨必欲盡絕根株毋遺遠患並於召見內
外臣工時詳加察訪從無一人議及弛禁者許乃濟冒昧瀆
陳殊屬紕謬著降爲六品頂帶卽行休致以示懲儆其時天
津鎮道在大沽一帶金廣興洋船拏獲煙土八十二口袋計

重十三萬一千五百餘兩並取獲煙具軍械乃在廣東省城
水西街開萬益號之廣東人李四莫仕梁等從嚴懲辦旋奉
廷寄賣大煙土者斬立決旗人吸煙者斬立決職任官本
人吸煙者照例治罪幕友長隨吸煙者本官失察革職永不
敘用民人吸煙治罪外子孫不準考試限一年內禁止盡絕
其如何盡絕之處著各督撫府尹妥議具奏 詔林則徐來
京面授方畧 命以兵部尙書頒給欽差大臣關防令馳赴
粵東會同兩廣總督鄧廷楨查辦海口節制水陸各師十一
月 陛辭出都十九年正月兩廣總督鄧廷楨等奏遵 旨

方除鴉片其矢血誠俾祛大患得 旨卿等同欽差大臣林則徐若能合力同心除中國大患之源不但卿等能膺懋賞即垂諸史冊朕之光輝豈淺鮮哉而民生之福政治之善又非淺鮮諒卿等亦不煩諄諄告誡也勉之勉之拭目待之此摺給林則徐閱看是月二十五日林大臣到粵維時粵中嚴拏興販吸食之犯坐地洋人不敢包匿其躉船寄棹零丁洋面者共二十二艘聞有 欽差到粵將欲開行林大臣欲窮治其事因咨會虎門水師提督碣石鎮總兵統帶各營分路把守傳令在洋躉船先將鴉片悉數繳銷方準開船二月初

四日傳集洋商伍怡和等十三洋行發交諭帖令傳諭各洋商公司人等並歷年販運鴉片之奸商查頓顛地二人查其煙土存儲之實數卽時稟覆抄諭陳奏諭內有本大臣旣帶關防得便宜行事若鴉片一日不絕本大臣一日不回誓與此事相終始之語奉 批覽及此朕心深爲感動卿之忠君

愛國皎然於域中化外矣傳諭後查頓聞風先遁時英公司

領事義律已知其事託辭回澳門

澳門屬香山縣明季爲葡萄牙國人租佔

不至

各洋行觀望推諉遷延不覆林大臣趣之急顛地始隨義律乘舟來省義律仍僵臥夷館如弗聞者因派兵役監守遂援

違抗封艙之案移粵海關監督將各洋商住泊黃埔之貨物一律封閉停其貿易又撤其沙文音近色債而羈禁之沙文者華人之受雇於洋館充買辦者也供應既窘消息不通憲船之在外者經兵役防守斷其岸上接濟餉道垂絕諭帖附

諭各國夷商知悉照得夷船到廣通商獲利甚厚不論所帶何貨無不全銷欲置何貨無不立辦是以從前來船每歲不及數十隻近年來至一百數十隻之多我大皇帝一視同仁準爾貿易爾纔得沾此利倘一封港各國何利可圖況茶葉大黃外夷若不得此卽無以爲命乃聽爾年

年販運出洋絕不靳惜 恩莫大焉爾等感 恩卽須畏
法利已不可害人何得將爾國不食之鴉片煙帶來內地
騙人財而害人命乎查爾等以此物蠱惑華民已歷數十
年所得不義之財不可勝計此人心所共憤亦天理所難
容從前 天朝例禁尙寬各口猶可偷漏今 大皇帝聞
而震怒必欲除之而後已所有內地民人販鴉片開煙館
者立卽正法吸食者亦議死罪爾等來至 天朝地方卽
應與內地民人同遵法度本大臣家居閩海於外夷一切
伎倆早皆深悉其詳是以特蒙 大皇帝頒給平定外域

屢次立功之 欽差大臣關防前來查辦若追究該夷人積年販賣之罪卽已不可姑容惟念究係遠人從前尙未知有此嚴禁今與明申約法不忍不教而誅查爾等見泊零丁等洋之躉船存貯鴉片甚多意欲私行售賣獨不思海口如此嚴拏豈復有人敢爲護送而各省亦皆嚴拏更有何處敢與銷售此時鴉片禁止公行人人知爲鳩毒何苦貯在夷躉久椗大洋不獨枉費工資恐風火更不可測也合行諭飭諭到該夷商等卽遵照將躉船鴉片盡數繳官由洋商查明何人名下繳出若干斤兩造具清冊呈官

點驗收明燬化以絕其害不得私毫藏匿一面出具夷字漢字合同甘結聲明嗣後來船永遠不敢夾帶鴉片如有帶來一經查出貨盡沒官人卽正法字樣聞該夷平日重一信字果如本大臣所諭已來者盡數呈繳未來者斷絕不來是能悔罪畏刑尙可不追既往本大臣卽當會同督撫兩院奏懇大皇帝格外施恩不特寬免前愆並請酌予賞犒以獎其悔懼之心此後照常貿易旣不失爲良夷且正經買賣儘可獲利致富豈不體面倘執迷不悟猶思捏稟售私或託名水手帶來與爾無涉或詭稱帶回該

國投入海中或乘間而赴他省覓售或搪塞而繳十之一
二是皆有心違抗怙惡不悛雖以天朝柔遠綏懷亦不
能任其藐玩應卽遵照新例一體從重懲創此次本大臣
自京面承 聖諭法在必行且旣帶此關防得以便宜行
事非尋常查辦他務可比若鴉片一日未絕本大臣一日
不回誓與此事相始終斷無中止之理況察看內地民情
皆動公憤倘該夷不知改悔惟利是圖非但水陸官兵軍
威壯盛卽號召民間丁壯已足制其命而有餘而且暫則
封艙久則封港更何難絕其交通我中原數萬里版輿百

產豐盈並不藉資夷貨恐爾各國生計從此休矣爾等遠
出經商豈尙不知勞逸之殊形與眾寡之異勢哉至夷館
中慣販鴉片之奸夷本大臣早已備記其名而不賣鴉片
之良夷亦不可不爲剖白有能指出奸夷責令呈繳鴉片
並首先具結者卽是良夷本大臣必先優加獎賞禍福榮
辱惟其自取今令洋商伍紹榮等到館開導限三日內回
稟一面取具切實甘結聽候會同督撫示期收繳毋得觀
望諉延後悔無及特諭

又諭夷人速繳鴉片煙土四條一論天理應速繳也查爾

等數十年來以害人之鴉片騙人銀錢前後不知幾萬萬矣爾則圖利而專利人則破產以戕生天道好還能無報應乎及今繳出或可懺悔消殃否則惡愈深而孽愈重爾等離家數萬里一船來去大海茫茫如風火雷霆之災蛟鱷鯨鯢之厄刻刻危機天譴可畏我大皇帝威德同天今要杜絕鴉片是卽天意要絕鴉片也天之所厭誰能違之卽如英國之犯內地禁令者前有大班喇佛圖佔澳門卽在澳門死道光十四年擘嘑啤闖進虎門旋卽憂懼而死嗎哩啞暗中播弄是年亦死此外尙有不循法度者或

回國而遭重譴或未回而伏冥誅各國新聞紙中皆有紀載 天朝之不可違者如是爾等可不懍懼乎一論國法應速繳也聞爾國禁令吸食鴉片者處死是明知鴉片之害人也若禁食而不禁賣殊非恕道若禁賣仍不禁偷賣是爲玩法 天朝販賣之禁本比吸食爲尤重爾等雖生於外國而身家養活全靠 天朝且住內地之日多住爾國之日少凡日用飲食以及積蓄家財無非 天朝恩典比之內地百姓更爲優待豈爾等於 天朝之法轉不知懍畏乎從前鴉片雖禁尙不加以嚴刑此是 天朝寬大

之政故於爾等私下販賣亦不十分窮究今則大皇帝深惡而痛絕之嗣後內地民人不特賣鴉片煙者要死卽吸鴉片煙者亦死試思爾等若不帶鴉片煙來內地民人何由而吸是內地民人之死都是爾等害之豈內地民人該死而爾等獨不該死乎今仰體大皇帝柔遠之心姑饒爾等之死只要爾等繳清煙土出具以後永不敢夾帶甘結如敢再帶人卽正法貨盡沒官這是寬既往而儆將來也何等包含渾厚且無論爾歷來所賣鴉片不計其數就論上年帶來鴉片偷賣約畧亦不少僅得躉船之見存

者儘數呈繳已極便宜那有再讓爾等多賺銀錢更誘內地民人買食以陷死罪之理恭查大清律例內載化外人有犯並依例擬斷等語從前辦過夷人死罪如打死人償命之類多有成案試思打死不過衅起一時尙當依律抵死若販賣鴉片真是謀財害命況所謀所害何止一人一家此罪該死乎不該死乎乃尙不思速繳煙土以免其死乎爾等細思之一論人情應速繳也爾等來廣通商利市三倍爾等帶來貨物不論粗細整碎無不聽爾銷售內地出產不論可喫可穿可用可賣者無不聽爾搬運不但

以爾國之貨賺內地之錢並以內地之貨賺各國之錢斷了鴉片而別項買賣正多則其三倍之利自在爾等仍可致富既不犯法又不造孽何等快活若必要做鴉片生意必致斷爾等貿易試問普天之下豈能更有如此好碼頭乎且無論大黃茶葉不得卽無以爲生各種絲帛不得卽無以爲織卽如食物中之白糖冰糖桂皮桂子用物中之銀硃藤黃白礬樟腦等類豈爾各國所能無者而中原百產充盈儘可不需外洋貨物若因鴉片而閉市爾等全無生計豈非由於自取乎況現在鴉片無人敢買爾等寄在

躉船按月有船租之價日夜有防範之工豈非多此枉費
一遇風狂火熾浪捲潮翻沈沒燒燬皆意中事也何如呈
繳而得賞乎一論事勢應速繳也爾等遠涉大洋來此經
營貿易全賴與人和睦安分保身乃可避害得利爾等售
賣鴉片貽害民生正人君子無不痛心疾首甚至興販吸
食之人罹於死罪皆由爾等賣煙而起卽愚闇小人亦多
抱不平之氣眾怒難犯甚可慮也出外之人所恃者信義
耳現在各官皆示爾等以信義而爾等轉毫無信義於心
安乎於勢順乎況以不應賣之物當此斷不許賣之時爾

等有何爲難有何靳惜且爾國不食勢難帶回若不繳官
雷之何用至既繳之後貿易愈旺禮貌加優豈非爾等之
福本大臣與督撫兩大院皆有不忍之心故不憚如此苦
心勸諭禍福榮辱皆由自取毋謂言之不早也道光十九
年二月十三日貼十三行

義律至是始謀於各商查明洋面躉船所存之鴉片據實稟
繳計二萬二百八十三箱值英金三百萬磅核銀約八百萬
兩稟詞附

英吉利國領事義律具稟 欽差大人爲恭敬遵諭稟覆

事轉奉鈞諭 大皇帝特命示令遠職卽將本英國人等
經手之鴉片悉數清繳一俟大人派委官憲立卽呈送如
數查收也義律一奉此諭不得不遵自必刻卽認真一體
順照緣此恭維稟請明示現今裝載鴉片之英國各船應
赴何處繳出至所載鴉片若干繕寫清單求俟遠職一經
查明當卽呈閱也謹此稟赴大人臺前查察施行

英吉利國領事義律敬稟 欽差大人爲遵諭呈單事昨
因謹奉大人鈞諭卽經遠職持掌國王所賜權柄示令本
國人等卽將英吉利人所有之鴉片如數繳送遠職也現

經遠職查明所呈共有二萬零二百八十三箱恭候明示
查收緣此謹稟赴大人臺前查察施行

林大臣得稟飭令各船駛赴虎門聽候收繳二月二十五日
派員收起至二十七日林大臣復會鄧總督親詣虎門一面
咨會提鎮各營統帶各標兵船分排口門內外海關監督駐
稅口專司稽查於是躉船二十二艘先後駛抵虎門詳細驗
收每艘大者千箱次者數百箱至四月初六日收畢核數得
實每箱酌賞茶葉五斤集外洋各商出具永不售賣煙土在
事後犯者人卽正法貨船入官切結據以奏聞其煙土請解

京師原奏云臣於正月二十五日到省時在洋躉船二十二隻已陸續起碇開行作爲欲歸之勢若但以逐回夷界卽爲了事原屬不難惟臣等密計熟商竊以此次特遣查辦務在永杜來源不敢僅顧目前因循塞責查夷情本皆詭譎而販賣鴉片者更爲奸滑之尤此次聞有欽差到省料知必將該夷躉船發令驅逐故特先行開動離卻向來所泊之零丁等洋以明其不敢違抗其實每船內貯存鴉片聞俱不下千箱因上年以來各海口處處嚴防難於發賣而其奸謀詭計仍思乘間覓售非特不肯拋棄外洋亦必不肯帶回本國

卽使逐出老萬山以外不過暫避一時而不久復來終非了局且內海匪船亦難保不潛赴外洋勾結售賣必須將其躉船鴉片銷除淨盡乃爲杜絕病源但洪濤巨浪之中未能確有把握因思躉船之存貯雖在外洋而販賣之奸夷多在省館雖不必遽繩以法要不可不喻以理而怵以威臣林則徐當撰諭帖責令眾夷人將躉船所有煙土盡行繳官與臣鄧廷楨怡良酌商定稿公同坐堂傳訊洋商將諭帖發給令其齎赴夷館帶同通事以夷語解譯曉諭立限稟覆一面密派兵役暗設維防惟查各國買賣以英吉利爲較大該國自公

司散局

英人貿易公司道光十四年散局

以後道光十六年派有四等職吏

人義律到澳門經管商梢謂之領事臣等發諭之後各國則皆觀望於英夷而英夷又皆推諉於義律其中有通曉漢語之夷人瞻等四名經司道暨廣州府等傳之公所面加曉諭因該夷瞻等回稟之言尙爲恭順當卽賞給紅綢黃酒著令開導眾夷速繳鴉片未據卽行稟覆至二月初十日義律由澳門進省其時奸夷顛地等希圖乘夜脫逃經臣等查知截回諭責義律以不能約束之罪並照歷屆英夷違抗卽行封艙之案移咨粵海關監督臣豫莖將各夷住泊黃埔之貨船

暫行封艙停其貿易又夷館之買辦工人每爲夷人潛通消息亦令暫行撤退並將前派暗防之兵役酌量加添凡遠近要隘之區俱令明爲防守不許夷人出入往來仍密諭弁兵不得輕舉肇釁在臣等以靜制動意在不惡而嚴而諸夷懷

德畏威均已不寒而慄自嚴密防守之後省城夷館與黃埔澳門及洋面躉船信息絕不相通該夷人疑慮驚惶自言愧悔臣林則徐又復疊加示諭勸戒兼施卽於二月十三日據該領事義律稟覆情願呈繳鴉片維時距撤退買辦之期業已五日夷館食物漸形窘乏臣等當卽賞給牲畜等物

二百數十件復向查取鴉片確數經義律向各夷人名下反覆追究旋據呈明共有二萬二百八十三箱查向來拏獲鴉片如係外洋原來之箱每一箱計裝整土四十包每包約重三斤每箱應重一百二十斤卽至日久收乾每箱亦約在百斤以外以現在報繳箱數覈之總不下二百數十萬斤若經奸販轉售則流毒何所不至今設法令其全繳不動兵刑無非仰仗天威自然畏服當卽諭令駛赴虎門以憑收繳除商明畱臣怡良在省彈壓防範外臣林則徐臣鄧廷楨同抵虎門水師提督臣關天培本在虎門駐劄凡防範夷船查拏

售私之事皆先與臣等隨時商榷務合機宜自收繳之諭既頒尤資嚴密防堵茲躉船二十二隻陸續駛至虎門口外關天培當卽督率將領分帶提標各營兵船排列彈壓並先期調到碣石鎮總兵黃貴署陽江鎮總兵楊登俊各帶該標兵船分排口門內外聲威極壯粵海關監督臣豫堃亦駐虎門稅口照料稽查臣等親率文武大小各委員隨收隨驗隨運隨貯惟數甚多一躉船所載之箱卽須數十隻剝船始敷盤運而自口外至口內堆貯之處又隔數十里若日期過促草率收繳恐又別滋弊端臣鄧廷楨擬收至兩三日後先回省

署辦公臣林則徐自當常駐海口會同提臣關天培詳細驗收經理一切容俟收繳完竣查明實在箱數與該夷領事所稟有無參差再行恭摺奏報並取具各夷人永不夾帶切結存案以斷根株伏思夷人販賣鴉片多年本干天朝法紀若照名例所載化外有犯並依律科斷之語卽予以正法亦屬罪所應得惟念從前該夷遠隔重洋未及遽知嚴禁今既遵諭全繳躉船鴉片卽與自首無異合無仰懇皇上覆載寬宏恩施法外免追既往嚴儆將來並求俯念各夷人鴉片起空無資置貨酌量加恩賞給茶葉凡夷人名下繳

出鴉片一箱者酌賞茶葉五斤以獎其恭順畏法之心而堅其改悔自新之念如蒙 恩準所需茶葉十餘萬斤應由臣等捐辦不敢開銷至夷人呈繳鴉片如此之多事屬創見自應派委文武大員將原箱解京驗明再行燒燬以徵實在奉 硃批所辦可嘉之至另有旨旋奉 上諭本日據林則徐等由驛馳奏查辦躉船盡數呈交煙土一摺可嘉之至躉船私販煙土希圖脫逃經林則徐等截回躉船二十二隻起獲煙土二萬二百八十三箱該夷船畏法自首情尙可原著免治罪該督等奏請酌賞茶葉之處照所議辦理此項煙土爲

數甚多俟收繳完竣卽查明實在箱數派委明幹員弁解京以憑核驗林則徐等查辦妥協自應量加鼓勵林則徐鄧廷楨著交部從優議敘怡良豫堃關天培著交部議敘又奉

上諭據林則徐等馳奏躉船鴉片盡數呈繳請解京驗明燒燬當降旨允行本日據御史鄧瀛奏稱廣東距京程途遙遠所繳煙土爲數較多恐委員稽查難周易啟偷漏抽換之弊等語林則徐等經朕委任此次查辦粵洋煙土甚屬認真斷不疑其稍有欺飾且長途轉運不無借資民力著毋庸解送來京卽交林則徐鄧廷楨怡良於收繳完竣後卽在該處督

率文武員弁公同查核目擊銷燬俾沿海居民及在粵夷人其見共聞咸知震懾該大臣惟當仰體朕意核實稽查不準在事員弁人等稍滋弊混於是林大臣會同督撫於虎門監視銷燬就海灘高處周圍樹柵開池二縱橫各十五丈有餘灌以海水投以石灰頃刻湯沸不爨自然潮退啟涵洞隨潮出海每日盡三四百箱至千箱不等自四月二十二日化起五月十五日畢事除去箱隻實共燒燬煙土二百三十七萬六千二百五十四斤先期出示令外洋人來虎門集視其時觀者如堵悉懼伏無異詞且有敘入外洋新聞紙中以紀其

事者遂下令盡逐外洋之躉船與澳門之奸夷不許逗遛內地其續到之船有鴉片者倘自揣不敢報驗卽日回國亦免窮究若仍沿舊以煙土卸寄躉船則入口時丈量船旁水蹟尺寸情僞立見必按夾帶鴉片新例人卽正法船貨入官所有進口之船均應照此具結並行文英國王一體嚴禁文附天朝欽差大臣兵部尙書湖廣總督林兵部尙書兩廣總督鄧兵部侍郎廣東巡撫怡會同移文於英吉利國王爲會禁鴉片煙事照得天道無私不容害人以利己人情不異孰不惡死而好生貴國雖在重洋數萬里外而同此天

道同此人情未有不明於生死利害者也我天朝四海
爲家大皇帝如天之仁無所不覆卽遐荒絕域亦在並
生並育之中廣東自開禁以來流通貿易凡內地民人與
貴國番船相安於樂利者數百年於茲矣且如大黃茶葉
湖絲等物皆國中寶貴之產貴國若不得此則無以爲命
而天朝一視同仁許其販運出洋絕不靳惜無非推恩
外服以天地之心爲心也乃有一種奸夷製爲鴉片夾帶
販賣誘惑愚民以害其身而謀其利從前吸食者尙少近
則互相傳染染毒日深在中原富庶蕃昌雖有此等愚民

貪口腹而戕生命亦屬孽由自作何必爲之愛惜然以大
一統之天下務在端風俗以正人心豈肯使海內生靈任
其鴆毒是以現將內地販賣鴉片並吸食之人一體嚴行
治罪永禁流傳惟思此種毒物係貴國所屬各部落內鬼
蜮奸人私行造作自非貴國王令其製賣且卽各國之中
亦止數國製造此物並非各國皆有然又聞貴國亦不準
人吸食犯者必懲自係明知其害人故特爲之嚴禁然禁
其吸食尤該禁其販賣並禁其造作乃爲公恕之道若徒
禁其吸食而仍製造販賣引誘內地愚民則欲己之生而

陷人於死欲已之利而貽人以害此則人情之所其恨天道之所不容以天朝威震華夷何難力制其命而仰體

聖仁寬大自宜詰誠於先且從前曾用公文

此文未見移會

貴國王一同嚴禁則猶得諉爲不知今與貴國王約將此害人之鴉片永遠斷絕我內地禁人吸食爾屬國禁人製造其從前已經製造者貴國王須卽令其搜盡投之海底斷不許天地間更有此種毒物非獨內地人民不受其害卽貴國民人既有造作安知其不吸食並令造作而禁之則貴國亦不受害豈不各享太平之福而益見貴國恭順

之忱如此則明乎天理而上天不至降災協乎人情而

聖人亦必嘉祥況內地既經嚴禁無人吸食卽該夷等仍
行製造終亦無處銷賣無利可牟與其虧本徒勞何不
改圖生業現在內地搜出盡付油火焚燒若再有夷船夾帶
鴉片前來不能不一體燒燬恐船內他貨亦難免玉石俱
焚是利未得而害已形欲害人而先害己 天朝之所以
能臣服萬國正有不測之 神威無謂言之不早也貴國
王接到此文卽將如何嚴禁斷絕緣由速行移覆幸勿誑
說遲延佇切盼切

五月王大臣等會議查禁鴉片章程三十九條一沿海奸徒
開設窯口勾通外洋囤積鴉片首犯擬斬梟爲從同謀及接
引護送之犯並知情受雇船戶擬絞監候該管官知情故縱
者革職失察者分別議處一沿海員弁兵丁受賄故縱擬絞
立決知情徇縱俱發往新疆官弁充當苦差兵丁爲奴失察
者分別議處兵丁杖徒一合夥開設窯口並合夥興販者以
造意爲首餘具以爲從論一沿海奸徒寄存洋船煙土照開
設窯口從犯治罪一官役拏獲販煙吸食之犯得財賣放者
與犯同罪賊重者計贓以枉法從重論失察之該管官分別

議處一收禁人犯如有禁卒人等將鴉片煙私行傳遞或爲代買者發極邊煙瘴充軍其遞解之犯解役人等有犯前項情弊發近邊充軍賊重者計賊以枉法論失察之該管官分別議處一兵役匪棍以查煙爲由肆行搶奪並挾讎誣賴者俱發極邊充軍賊一百二十兩以上者爲首擬絞監候失察之該管官分別議處一鴉片煙案內流罪以上人犯吉稱畱養者概不查辦一事未發而自首者免罪聞拏投首者減一等首後復犯加一等治罪一吸食之案止準官弁訪拏不許旁人訐告一開設煙館首犯擬絞立決從犯及知情租屋者

發新疆給官兵爲奴兵役包庇與犯同罪有贓計贓準枉法從重論失察之該管官分別議處一栽種罌粟造製煙土及販煙至五六百兩或興販多次者首犯擬絞監候爲從發極邊煙瘴充軍興販一二次數不及五百兩者爲首發新疆給官兵爲奴爲從發邊足四千里充軍兵役賄庇與首犯同罪贓重者計贓以枉法從重論其知情租給房地之業主受雇之船戶一年以外者發邊遠充軍一年以內杖流半年以內杖徒州縣官知情故縱者革職永不敘用失察之該管官分別議處一栽種罌粟尙未製煙售賣及收買煙土煙膏未售

賣者爲首發極邊煙瘴充軍爲從杖流一吸煙人犯均予限一年六箇月限滿不知悔改無論官民概擬絞監候一平民吸煙在一年六箇月限內者擬杖流如係旗人銷除旗檔一體實發一在官人役並官親幕友一年六箇月內在署吸煙者照平民加一等治罪該管官知情故縱者革職失察者降調一職官吸煙在一年六箇月內者發新疆充當苦差一兵丁吸煙在一年六箇月內者發近邊充軍該管官知情故縱者革職失察者分別議處一開設煙館栽種罌粟製煙興販首從各犯除見擬死罪外其餘俟一年六箇月後均擬絞監

候一吸煙人犯雖經改悔戒絕但有存煙灰者杖一百一製賣鴉片煙具者照造賣賭具例分別治罪失察及拏獲之該管官分別議處議敘一同居子弟有吸煙者家長照不能禁約子弟爲竊例治罪一職官因吸煙發往新疆者概不準各城大臣因事保奏一宗室覺羅吸煙者發往盛京嚴加管束如係職官及王公均革職革爵發往盛京永不敘用如犯在一年六箇月限滿後者照新定章程加重擬絞監候宗人府會同刑部恭進黃冊請旨一太監內如有從前吸食者限一箇月內自首免罪再限三箇月內令總管太監認真搜查

如有收藏煙具者審明從重治罪如三箇月限滿半年以內有在禁門以內各值房吸食者均擬絞監候在外圍值房吸食者枷號六箇月發極邊煙瘴永遠枷號遇赦不赦失察之總管首領及同屋太監奏請分別降革治罪如係首領吸食均照禁門以內新擬罪名辦理失察之本管總管奏請分遣究出販煙之人同罪若係民人交刑部加等治罪至 陵寢首領太監等有吸食者照外圍辦理其王公門上及各大臣宅中之太監等有吸食者交慎刑司永遠枷號不赦如半年以後仍有吸食在宮門以內者擬斬監候外圍等處及 陵

寢當差並王公門上大臣宅中並已爲民太監等擬絞監候
各項失察處分仍照前議辦理一洋商住澳住行賣貨完竣
卽飭遵照定限起程如逾限久畱照違制律治罪一官兵查
拏鴉片煙遇有大夥拒捕者準放鳥槍格殺勿論一銷燬煙
土令督撫親驗眞僞以防偷換一沿海各省洋船進口督撫
派公正大員實力搜查一各省海關監督於洋船帶煙進口
知情縱放者革職失察者分別議處一各省拏獲煙犯將由
何處購買何人包庇護送及經過地方逐一根究分別懲辦
該管官受賄故縱者革職治罪知情者革職失察者分別議

處一拏獲吸煙人犯承審徇情開脫照故出人罪例治罪一
吸食已戒平民例得免罪惟職官爲民表率如曾經吸食者
均勒令休致一拏獲囤積興販各犯無論鄰境本境均準給
予議敘仍分別送部引 見一訪獲吸食者亦準酌請議敘
一在京各衙門及外省督撫將吸煙之員列入京察卓異卽
將原保舉官議處一京城地面五方雜處稽查尤應嚴密應
責成步軍統領衙門順天府五城隨時訪察仍嚴禁番役等
訛索擾累一各省保甲飭地方官認真編查如牌長有受賄
知情等弊一體懲辦一地方官朔望宣講後卽將吸食鴉片

之害傳齊眾人明白宣示庶免誠兄勉咸知自愛奏入得旨上年黃爵滋條奏鴉片積弊請旨設法嚴禁當交各將軍督撫等各抒所見妥議以聞嗣經陸續奏到並據科道等官先後條陳特降諭旨交大學士軍機大臣會同各該衙門議奏茲據詳議章程會同奏入朕詳加披閱尙屬周妥俱著照所議辦理並著纂入則例永遠遵行各該衙門卽速行刊刻頒發各直省將軍督撫等轉行所屬地方文武員弁一體遵照明白出示曉諭咸使聞知時米利堅今稱美國諸國皆遵具切結義律自省去澳復遞稟言違禁販煙之弊亟應設法早除

如準委員來澳會議章程可冀常遠除絕林大臣批示獎勵
義律又稟請本國商船泊近澳門林大臣以澳門向例惟準
設西洋額船二十五艘若英夷援此例不入黃埔則海關虛
設而私煙夾帶更無從稽查駁不許義律乃倡言不準泊澳
便無章程可議因不受所賞茶葉不肯具結必俟奉國王命
定章程方許貨船入口時義律已寄信附貨船回國往返不
過半年而五月內有尖沙嘴夷船水手毆斃邨民林維喜之
事諭義律交夷犯抵罪義律遲未交出林大臣鄧總督遵例
禁絕新蔬食物入澳並以澳門寓夷既不進口貿易卽不應

逗畱澳門義律乃率眷屬及在澳英夷五十七家同遷居尖
沙嘴貨船時躉船一朝失利不無怨望義律以公司領事鼓
動羣夷暗招夷埠吐密嘩喻兵船二艘來粵又擇高大貨船
三艘配以礮械赴九龍地方假索食爲名突開礮攻我水師
我參將賴恩爵揮兵發礮擊翻雙桅夷船一舢板船一而奸
夷所雇呂宋日斯巴尼亞國屬地在臺灣東南大海中躉船逗畱潭子售煙者亦
於八月初間爲我水師攻毀人船並獲義律託澳門西夷爲
轉圜願盡遣躉船回國其貨船亦願具結如有夾帶者船貨
充公林大臣令結內應加人卽正法之語且責交出兇犯旋

有其國兩船遵式具結驗無夾帶鴉片於九月底入口而義律遣二兵船阻之又投稟請勿攻毀尖沙嘴之船以俟國王之信水師提督關天培以兇犯未交擲還時我師船五隻在洋彈壓夷見前稟不收又見我師船紅旗卽發礮來攻我師連挫之夷先發礮者外洋示戰以紅旗止戰以白旗誤會我懸紅旗以示戰耳事 聞十一月初八日奉 詔停止英夷貿易義律復遣人乞恩謂在粵辦事多年嗣後請遵 大清律辦理而仍無違於國王之法許英船回居澳門俟王諭至再開貿易林大臣以新奉 諭旨不便驟更復嚴與之絕英

船始均駛出老萬山而粵洋漁船蛋艇亡命之徒貪薪蔬之厚值與鴉片煙交易趨之若鶩時林大臣已奉總督兩廣之命義律忽行文照會索償煙價蓋已得彼國王回諭也初鴉片以藥材入中國康熙十年以前歲不過數十箱乾隆三十年前每年尙僅二三百箱乾嘉之際吸食者漸多則不過千箱道光初年已逾四千箱十二年多至二萬三千六百餘箱西人紀載嘉道間印度入中國大小鴉片箱數價值詳附嘉慶二十二年大鴉片二千六百十箱小鴉片六百箱共三千二百十箱價洋銀三百六十五萬七千圓 道光二

年大鴉片二千九百十箱小鴉片一千七百十八箱共四
千六百二十八箱價洋銀八百三十一萬四千六百圓

道光六年大鴉片三千六百六十一箱小鴉片六千三百
八箱共九千九百六十九箱價洋銀九百六十一萬八
五圓 道光七年大鴉片五千一百三十四箱小鴉片四
千四百一箱共九千五百三十五箱價洋銀一千四十二
萬五千七十五圓 道光八年大鴉片五千九百六十五
箱小鴉片七千七百七十一箱共一萬三千七百三十六
箱價洋銀一千二百五十三萬三千一百十五圓 道光

九年大鴉片七千一百四十三箱小鴉片六千八百五十一箱共一萬三千九百九十四箱價洋銀一千二百五萬七千一百五十七圓 道光十年大鴉片六千六百六十七箱小鴉片一萬二千一百箱共一萬八千七百六十七箱價洋銀一千二百九十萬四千二百六十三圓 道光十一年大鴉片五千九百六十箱小鴉片八千二百六十五箱共一萬四千二百二十五箱價洋銀一千一百五十萬四千二百六十三圓 道光十二年大鴉片八千二百六十七箱小鴉片一萬五千四百三十三箱共二萬三千六百七十

箱價洋銀一千五百三十三萬二千七百五十九圓 自
嘉慶二十二年至道光四年每年入中國大小鴉片牽計
四千四百五十五箱大箱牽值洋銀一千四百四十六圓
小箱牽值一千七十三圓道光五年至十一年每年入中
國大小鴉片牽計一萬一千九百五十三箱大箱牽值九
百六十五圓小箱牽值八百六十二圓前後十五年中大
箱價值最貴在道光二三年間每箱值二千五百五十圓
最賤在道光十一年間每箱值七百九十圓小箱價值
最貴在嘉慶二十五年道光元年間每箱值一千八百圓

最賤在道光十一年間每箱值五百二十圓

後此仍有增無減是年所燒之煙英國自稱破費洋銀一千二百餘萬圓卽米利堅人核其成本亦在六百萬圓英以印度餉項所自出與民俱病之義律自念非力破此局不足以裕庫藏又念非合縱於外夷不足以樹黨援遂將各躉船繳銷之煙土按照一千二百萬賠償皆寫立匯單付各躉船回國交兌又遣人徧告孟加刺怵以生計之失印度民無不洵懼黑夷白夷更番應募不足則告助於佛郎西

今稱法國

米利堅

等國米利堅素不善英所爲謂旣在中國貿易宜遵中國律

例鴉片本非教中所應行予以繳銷正與外洋違禁之物罰
貨入官之例相符故英計不行而佛郎西觀望年餘始遣兵
船至香港又爲靖逆將軍奕山所聞遂託以居間講款爲詞
其事亦寢又見粵東自燒煙後海口嚴密無間可乘遣兵船
分擾閩浙以乘我未備二十年六月陷甯波之定海七月林
大臣等奏續獲販煙人犯九月 諭前因鴉片煙流毒海內
特派林則徐馳往廣東海口會同鄧廷楨查辦原期肅清內
地斷絕來源隨地隨時妥爲辦理乃自查辦以來內而奸民
犯法不能淨盡外而興販來源並未斷絕本年福建浙江江

蘇山東直隸盛京等省紛紛征調糜餉勞師此皆林則徐等
辦理不善之所致林則徐鄧廷楨著交部分別嚴加議處林
則徐卽行來京聽候部議兩廣總督著琦善署理未到任以
前著怡良暫行護理旋命林則徐鄧廷楨赴廣東備查問
差委先是八月琦大臣自天津奏英人船隻全行起碇南旋
並稟稱沿海各處如不開槍礮亦不敢生事端定海之兵亦
可先撤一半上命琦善爲欽差大臣赴廣東查辦並諭
伊里布宋其沅裕謙邵甲名託津布鄧廷楨林則徐等一體
遵照防守要隘洋船經過或停泊外洋不必開放槍礮十一

月琦大臣入粵議撫義律首索十九年燒煙之價許之又索
香港全島以爲貿易來往市埠琦大臣不答十二月奏粵省
實在情形並節次奉 旨飭查事件一洋人索償煙價緣林
則徐示令繳煙時節次論文均有奏請賞犒獎勵字樣洋人
頗存奢望迨後每煙一箱僅給茶葉五斤該洋人所得不及
本銀百分之一而又勒具以後再犯鴉片煙船貨入官人卽
正法之甘結迄未遵依此釁所由起也一 硃筆點出林則
徐奏躉船二萬餘箱係英國領事義律自行遞稟求收等語
查義律遞稟距林則徐撤退買辦已五日可見窘迫而然非

出情願時義律僅止孤身設有黨援未必降心俯首云云二十一年正月英人撲虎門兵艦中有輪船四艘琦大臣允爲奏懇給地通商 上命奕山至粵統兵會剿時琦大臣已受

嚴譴撫議方息而義律以乘勝之師先發之遂破虎門闖入烏涌卡稱兵於省河四月英人攻省城急壞城外四方礮臺廣州府知府余保純言於靖逆將軍曰彼以索煙價來未可以空言撫也無以應次日礮子直入老城貢院前靖逆將軍謀於督撫請先遣其縋城出見義律義律謂余是隨林大臣查辦之員不應忘二萬餘箱之煙價靖逆將軍因奏請復

準通商維時米利堅人深以各躉船收回煙價不應向義律索加倍之償因余保純固請裁減乃勸義律援照成本按原索之半數償以銀六百萬兩乃罷兵而以償款作爲追交商欠完案然英人無厭之求已畱爲異日再索之張本矣二十二年秋英國公使因公所使璞鼎查率馬利遜等稱兵要撫至江甯省城 命廣州將軍宗室耆英乍浦副都統紅帶子伊里布爲 欽差大臣與璞鼎查議款遂索款二千一百萬兩首列煙價六百萬補足一千二百萬之原數次列商欠三百萬以粵東原議未及商欠一款也至戰費一千二百萬則

自入粵後償其所失而香港一島亦遂予英且準五口通商
議十三條謂之江甯條約是年七月二十四日耆大臣等詣
英國汗華麗兵船就約鈐印九月二十四日奉 硃批俱著
照所議辦理是爲中外立約之始時靖逆將軍遠在粵東旣
不與聞米利堅人亦無至者遂一任璞鼎查予取予求議款
悉出自英人手定於是鴉片弛禁之議復起